

## **PIITA** **gbounsinsinn nba ki u din sob** **nae na**

*Ki jiiin 1 Piita gbouŋ na po*

Piita sinsinn gbouŋ na din saa Yiisaweira nba ki bi yib “Yennu nigannkab” na boore. Njamme din yat be Asia gaŋ po yent na ni.

Gbouŋ na barjar tee lin tur binba be mukir nan biak ni, bi yada paak nae kpaŋ-n-mɔŋ.

<sup>1</sup> Min Piita nba tee Yiisa Masia toonii nae sobin gbouŋ na ki teen Masiaweira nba yat ki be Pontus nan Galasia nan Kapadosia nan Asia nan Bitinia tinii ni ki tee saamm na. <sup>2</sup> Ti Baa Yennu dɔŋ ganni, ki mi nan i tan saa teen u niiba, ki u Seyeen te ki i tee popeendamm, ki u ganni a yii saak Yiisa Masia mɔb, ki u wuur i para nan u sɔn. Yennu ninkpabaun nan parmaasir-ii be nani bonchiann.

*Ki jiiin barmɔnii dindann po*

<sup>3</sup> Pakin Yennu nba tee ti Yomdaano Yiisa Masia Baa na man, kimaan u tint ninbaauk bonchiann ki turit manfopaann Yiisa Masia kuun fiiru paak. Linba nae te ki ti mɔk dindann nan ti tan sii mɔk manfoor, <sup>4</sup> ki la linba tee Yennu waas yar, ki li sii be mɔkmɔk nan mɔkmɔk, ki kan biir, li fant bia kan siiri, ki li be Yendouŋ ni <sup>5</sup> ki guu yimm nba ki Yennu paŋ dia-i, i yada paak, a yin la i tinnu nyoot nba teen siir ki saa nyi paanu, dajoontii na.

<sup>6</sup> Li paak, ii mɔk parpeenn man; li-i lekii tee ki i mɔk parbiir yoo waamina motana, yaa

la biakbooru booru na paak, ii mək parpeenn. <sup>7</sup> Biak maŋ bikii-i a lin laan i teen Masia yada fanuwa-a? Li tee nan baa tuu jii salima ki teen muu ni a bin la li ŋant nae. I yada teenu ŋan Yennu boor ki gar salima gbaa. I yada teenu-i ŋan, ŋanne saa te ki yin la paku nan dontir nan baakir, yoo nba ki Yiisa Masia tan saa nyi paanu na.

<sup>8</sup> I ki mi lau ŋaan loonɔ; i bia ki laato mɔtana, ŋaan teenɔ yada, ki mək parpeenn bonchiann nba ki niro kan fit wann laa tee bianɔnba. <sup>9</sup> Yaa teenɔ yada na paak, i la tinnuwa. <sup>10</sup> Tinnu nae ki sokiniinba din loon bin bann li paak nan ninmɔnn, ki sokint a yimme ki Yennu saa tini ninbaauk na. <sup>11</sup> Masia Seyeen nba din be bi ni na din wannib a u tan saa di biak; ki li poorpo ki u bia tan saa la baakir bonchiann; ki bi koor a bin bann yoo nba ki li tan saa tun, ki bia loon bin bann laa tan saa tun bianɔnba. <sup>12</sup> Ki Yennu fiit wannib a bi ki sokint bi mɔŋ sommir paak kaa, ŋaan i sommir poe ki bi sokint. Yennu Seyeen nba ki u din tumɔ a wun nyi Yendɔun ni nae mun te ki binba mɔntir barnanii na beeri barii maŋ. Linba nae ki malakanba gbaa loon bin bann li paak.

### *Ki jiiŋ kasii binben po*

<sup>13</sup> Li paak, ii teen i dudukit siir nan yan, ki soor i mɔŋ, kii mək dindann nan barmonii nan i saa di manu bonchiann, yoo nba ki Yiisa Masia tan saa nyi paanu na. <sup>14</sup> Ii sak Yennu mɔb man, ki ji daa waa loonbiit nba ki i din waa, yoo nba ki i din ki mi Yiisa Masia na. <sup>15</sup> Yennu nba yiini na tee

kasiie, li paak, ii muni tee kasii man, <sup>16</sup> kimaan li sob Yennu gbouŋ ni a “Ii tee kasii man, kimaan min Yennu tee kasiie.”

<sup>17</sup> Li-i tee ki i mei Yennu, i yiu Baae; ɲooe bu niib kur buut nan baa tun bianɲinba na, ki ningannii kaa; li paak, yoo nba kur ki i be tingbouŋ na ni, ii tiinɔ man. <sup>18</sup> I mi nan Yennu nba nyinni binbenbiik nba ki i din gaar i baanba boor na, u ki jii bont nba saa biir nan likirii nba saa biir bianɲinba na kaa ki pa, <sup>19</sup> ɲaan u jii Yiisa Masia sɔn nba ɲan gar likirii nae; ki u tee nan maruŋ pegann nba ki mɔk biit koo dɔk u paak na. <sup>20</sup> Yennu nba daa din ki nan durinya yoo nba na, ɲaan ki u poŋ gann Masia a wuu tee maruŋ maŋ, ki u tan nyii paanu dajoontii na ni, ti paak. <sup>21</sup> U paake ki i teen Yennu yada. ɲooe din fiinɔ kuun ni ki turo paŋ; li paake ki i mɔk yada nan dindann Yennu boor.

<sup>22</sup> Yaa gaar Masia labaar nae ki i nyii biit ni, ki ji loon i naa waas nan barmɔnii; li paak, ii loon i leeb man nan i para kura. <sup>23</sup> I la manfopaanna. Li manfoor ki nyii bonboorik nba kpenn ni kaa, ɲaan li nyii bonboorik nba ki kpenn na nie. Yennu maan nba mɔk manfoor ki sii be mɔkmɔk nan mɔkmɔk nae turi manfoor maŋ. <sup>24</sup> Li sob Yennu gbouŋ ni a:

“Nisaarik kur tee nan mɔot nae,  
ki u fant tee nan mɔot puuk na.  
Mɔot jɔokit ki li puut suur baa,

<sup>25</sup> ɲaan Yennu maan na ɲarin kaa gbennu.”  
Maan maŋe tee barnɲanii nba ki bi din mɔontir  
ki teeni na.

## 2

### *Ti Yomdaanoɔ tee manfoor tann*

<sup>1</sup> Tɔn, ii nyik biit kur, nan faak kur, nan kpinkpanni, nan funfunn, nan sanjaaun. <sup>2-3</sup> I ponj la nan ti Yomdaanoɔ nane, li paak, ii loon Yennu mɔmaan man nan sanpantik nba loon biin bianjinba na; kimaan maan mane saa te ki yin kpaat tinnu sɔnu ni.

<sup>4</sup> Baat ti Yomdaanoɔ boor man; nɔɔe tee manfoor tann nba ki niib yêto, nãan ki Yennu ganno ki u nãan bonchiann na. <sup>5</sup> Nãant man ki Yennu n jii-i ki yii tee nan manfoor tana na, ki wun maa nãak nba ki u Seyeenj sii be li ni; ki i sii tee Yennu mɔn mɔn toontunna kii tuun u toonn nan u Seyeenj panj, ki u saa gaar li toonn Yiisa Masia paake; <sup>6</sup> kimaan li sɔb Yennu gbounj ni a: “Gotir, n gann tann ki bir Sayonn doo ni, ki li tee lotik ni tann, ki bia nãan bonchiann, ki wunba kur teeno yada, u kan di fei.”

<sup>7</sup> Yimm nba teeno yada na mi nan u nãan bonchiann ki turi; nãan binba ki teeno yada na, bii mi nan li sɔb Yennu gbounj ni a:

“Tann nba ki tanmaara yêtir na, nãanne tan tee lotik ni tanãann.”

<sup>8</sup> Li bia sɔb a:

“Tann mane ki niib saa gbiat, tanpiiuk mane saa te ki niib n baa.”

Baa ki sak Yennu mɔmaan paake ki bi gbiatir, nan waa din sennib bianjinba na.

<sup>9</sup> Nãan yimm nãarin tee Yennu nigannkabe, ki bia tee u naan ni niib nba jiantiro, ki bia tee nibooru nba tee popeendamm, ki bia tee u tiorj

niib, ki yii moontir ɲoo nba nyinni bunbɔnn ni, ki baar nani u baktinauŋ yentu ni na burchintuk po. <sup>10</sup> Sianyoo i din ki tee Yennu niibi, ɲaan motana i ji tee u niibe; sianyoo u din ki tini ninbaauku, ɲaan motana u tini ninbaauka.

### *Ki jiin Yennu daaba po*

<sup>11</sup> N naa walonkai, yaa tee saamm tingboun na ni na, n kpaaniie a ii nyik gbanant loonbiit nba kon nan i sei na, <sup>12</sup> ɲaan kii be fanu tingboun na niib sinsuuk ni, ki li-i tee ki bi sukii-i a i tee biitdamm, bin la i toonɲana ki dont Yennu, daar nba ki u tan saa baar na.

<sup>13</sup> Ti Yomdaano paak, ii saak man yentdamm moi: ii saak kpanbar nba tee yent kur daano na moɔ, <sup>14</sup> ki waa senn sennu damm nba a bii daar binba tuun toonbiit na tuba, ɲaan kii piak binba tuun toonɲana na, ii saak bi moi man. <sup>15</sup> Kimaan Yennu loomm tee yii tuun toonɲanae ki goor jatit maan nba ki mok nyooti. <sup>16</sup> Ii be yent-n-moŋ binbeŋ; ɲaan i daa dia i yent-n-moŋ binbeŋ maŋ ki li tee yaak ki i tuun toonbiiti, ɲaan kii mok Yennu daaba binbeŋ. <sup>17</sup> Ii teen soo kur baakir, kii loon Masiaweira, kii tiin Yennu, kii teen kpanbar maŋ baakir.

<sup>18</sup> Yimm nba tee daaba na, ii saak i saakab moi kii teemm baakir, ki li daa tee niŋamm kuukoɔ kaa, ɲaan nan nibiita. <sup>19</sup> Li-i tee ki a la tubdatu a toonɲana paak, ki dukii Yennu po ki di sukuru, ɲanne saa penn u par; <sup>20</sup> ɲaan fi-i tun biit ki bi dat a tubir, ki a gaar tubdatu na soon nna, nlee ki bi saa pakani? ɲaan fi-i tun linba ɲan ki gaar tubdatu li paak soon nna, ɲanne saa penn Yennu

par. <sup>21</sup> Yennu din yiinit a tii di biak, kimaan Masia tiɔŋ din dii biak ti paak, a tii gorii u binben kii waa u taabana. <sup>22</sup> U din ki tun biit gbaa; ki faak bia ki mi nyii u mɔb ni. <sup>23</sup> Baa din sukiiɔ, u din ki jiin sukiti; baa din dintɔ biak na, u ki jeen sɔɔ, ɲaan jii u mɔŋ ki teen Yennu nba bu niib buut barmɔnii na nuu ni. <sup>24</sup> Nɔɔ Masia mɔŋ mɔŋe din jii ti toonbiit u gbanant ni, ki bi kpaau dapunpunn paak, a tin nyi biit ni kii tee ninamm. U daŋ paake ki i la laafia. <sup>25</sup> I din tuu tee nan pebotkai nae, ɲaan mɔtana i jen i kpaaritɔɔ nba guu i sei na boora.

### 3

#### *Ki jiin poob nan bi sɔrib benu po*

<sup>1</sup> Poob, sakin man i sɔrib mɔi. Bi siab-i kii teen barnanii na yada, ɲaan li pasiar i binbenɲaŋ paak, bi saa teen yadawa, ki li kii kpaas talas yin yet siar gbaa, <sup>2</sup> kimaan bi-i la nan yimm nba teen Yiisa yada na binben ɲani, bi mun saa teenɔ yadawa. <sup>3</sup> Poob, daa jikit i mɔŋ ki want i fant nan yuloru, koo salima tuliati, koo chinchennana gbabu kaa. <sup>4</sup> ɲaant man ki i fant-ii tee para nba be soon nna nan ɲminɲminn; ɲanne tee fant nba kan biiri, ki bia ɲan bonchiann Yennu boor. <sup>5</sup> Yaayoo ni poonamm nba din teen Yennu yada na, nnae ki bi din faɲit bi mɔŋ, ki saak bi sɔrib mɔi. <sup>6</sup> Nnae ki Sara din saak u sɔrɔ Abraham mɔb ki yiu u yomdaano. Li-i tee ki i tuun ki li ɲan, ki ki tiin siari, ɲann i tee Sara maŋ bonpoie. <sup>7</sup> Jab, ii muni be fanu man nan i poob, kii mi nan bi tee tariie i boor, kii teemm baakir,

kimaan yimm nan ɲamm kur tan saa gaar Yennu piinɲann nba tee manfoor na; ɲanne saa te ki Yennu n gaar i miaru.

*Ki jiin Masiaweira binbenj po*

<sup>8</sup> Linba biar tee nnae; i kur-ii mək dudukyenn man, ki i baka-ii be i leeb ni, kii mək lomm nan Masiaweira, kii tiin i leeb ninbaauk, kii sikint i mɔŋ. <sup>9</sup> I daa tuun biit ki jiint biit paaki, i bia daa sukii ki jiint wunba sukii-i, ɲaan jiinɔ a “Yennu n teen piisin a paak,” kimaan Yennu din yiini a yin gaar piisime. <sup>10</sup> Li sɔb Yennu gbouŋ ni a:

“Wunba loon manfoor nba mək parpeenn,  
ki loon wun tan la benu nba ɲan,  
wun nyinn u mɔŋ barbiit nan faak maan ni,  
<sup>11</sup> ki nyik biit tumu, ɲaan kii tuun toonɲana,  
ki lon parmaasir sɔnu kii waa-r,  
<sup>12</sup> kimaan ti Yomdaanɔ kpaa u ninbina niɲamm  
paake,  
ki bia gbia bi miaru yoo kura;  
ɲaan kɔn nan toonbiit damm na.”

<sup>13</sup> Li-i tee ki i numm mɔn nan toonɲana tumu, sɔɔ be ki saa teeni siar-ii? <sup>14</sup> Li-i lekii tee ki i la tubdatu i toonɲana paak, parpeenn sii tee i yare; i daa tiin nisaarik, ki bia daa te ki li daamiini. <sup>15</sup> Tinin ti Yomdaanɔ Masia i para ni. Ii teen siir yoo kur ki jiin wunba boi-i yaa mək dindann nba na po. <sup>16</sup> Ii gato soon nna kii tiin Yennu, ki ɲaan ki i benu-ii ɲan, ki bi-i sukii-i, yaa tuun toonɲana Masia paak na, bin di fei bi sukut maŋ ni. <sup>17</sup> Li-i tee Yennu loomm nan i di biak toonɲana paak, li chee yin di biak toonbiit paak; <sup>18</sup> kimaan Masia din gaar timm biitdamm

kur paak ki kpo yomkooe; niŋaŋo maŋe din gaar biitdamm paak ki kpo, a wun te tin saan Yennu boor. Bi din kpiiu, ŋaan ki u bia fir kuun ni, Yennu Seyeen paŋ ni. <sup>19</sup> Li Seyeen nie ki u din saan sei nba koo sarik kpeentiŋ na boor, ki saa pak Yennu maan ki turib; <sup>20</sup> ŋamme din tee niib nba ki sak Yennu mɔb, yoo nba ki u din dii sukuru Nowa yoo na, yoo nba ki ŋoo Nowa din ŋamm ŋaringbenir; ki niib banniin kuukoo din koo ŋaruŋ maŋ ki tinn nyun ni na. <sup>21</sup> Nyun maŋe tee Yennu nyunwuru ninnauŋ nba tinnit motana; li ki tee ti gbanant paak wuru kaa, ŋaan li tee taa mei Yennu a wun wuur ti para, Yiisa Masia kuunfiiru na paake. <sup>22</sup> U saan Yendouŋ nie ki be Yennu niidiitu po, ki malakanba nan sanpaapo yentdamm kur saak u mɔb.

## 4

### *Ki jiiŋ toonbiit nyiku po*

<sup>1</sup> Masia nba din dii biak ti paak na, ii mun chee i para kii dukii nna, kimaan wunba dii gbanant paak biak, u nyii toonbiit tumu niwa. <sup>2</sup> Laa jii yoo na ki saa, i daa jikit i gbanant ki tuun nisaarik loonbiiti, ŋaan kii waa Yennu loomm. <sup>3</sup> Yoo nba gar, i din jii i yoo ki tuun toonbiite. I din tuun i mɔŋ loonbiite, ki nyu daan yib, ki di diina ki mɔk fuut, ki tikii leeb danyuboa, ki mann pata, ki tuun nan binba ki tee Masiaweira na nba loon bianinba na. <sup>4</sup> ŋaan motana, yaa ki waab ki tuun li toonbiit na, li gbatibe, ki bi ji biir i sana. <sup>5</sup> ŋaan bi tan saa pak bi mɔŋ biit ki tur Yennu nba teen siir a wun bu footib nan kpeemm buut



na. <sup>6</sup> Nanne teen ki Masia din pak barɲanii na ki tur binba kpo na gbaa; bi lek din kpo nan soɔ kur nba kpenn bianjinba nae; ki u din pak barɲanii mane ki turib a bin la yaak ki bi sei n mɔk manfoa, Yennu boor.

*Ki jiiɲ yan nba ki Yennu teeni na dianu po*

<sup>7</sup> Bona kur gbennu ji ki fɔk; li paak, ii soor i mɔɲ kii sub ki fit kii mei Yennu. <sup>8</sup> Linba gar bont kur tee yii loon i leebe fanu, kimaan lomm dɔkint biit bonchiann. <sup>9</sup> Ii gaan leeb saauɲ ki daa burimi. <sup>10</sup> Soɔ kur nan waa gaar yan nba nyii Yennu boore, i diar fanu ki jii yan maɲ ki somm i leeb. <sup>11</sup> Wunba ki Yennu sennɔ a wuu mɔɔntir barɲanii na, wuu mɔɔntir linba ki Yennu teenɔ nae; wunba mun ki Yennu sennɔ a wuu sommit leeb, wuu sommitib nan u paɲ nba ki Yennu teenɔ na, ki Yennu n la paku bonsiar kur ni, Yiisa Masia paak; ɲɔɔ Yennu-e yen paku nan paɲ kur mɔkmɔk nan mɔkmɔk. Mamɔmm.

*Ki jiiɲ Masiaweiu biak dinu po*

<sup>12</sup> N naa walonkai, yaa di biak nba bikii-i na, i daa te ki li bakitiri ki tee bonsaann i boori. <sup>13</sup> Yaa di biak Masia paak na, ii mɔk parpeenn man, ki yoo nba ki u tan saa nyi paanu nan yentsaakar na, i saa la parpeenn bonchiann. <sup>14</sup> Bi-i sukii-i Masia sann paak, parpeenn tee i yare, kimaan Yennu Seyeenɲ nba mɔk paɲ bonchiann na be i ni. <sup>15</sup> Naan soɔ biak dinu-i tee nikpinu koo nanyuk koo toonbiit tumu koo kpikpiruk toona paak, li ki ɲani; <sup>16</sup> fi-i di biak faa tee Masiaweirɔ na paak, a daa tiin fei, ɲaan dont Yennu, Masia sann paak.

<sup>17</sup> Yoo baara ki Yennu saa piin ki bu niib buut. U saa bu u tiɔŋ niib buute sinsinn; ki li-i tee ki u bu timm nba tee u niib na buut sinsinn, ki binba ki sak u barnanii na yar ji sii tee nlee? <sup>18</sup> Li sɔb Yennu gbouŋ ni a

“Li-i paar ki niŋamm n tinn, ki biitdamm nan binba ki tiin Yennu na ji saa teen nlee ki tinni?”

<sup>19</sup> Li paak, binba di biak Yennu loomm paak na, bii tuun toonjana, ki jii bi mɔŋ ki pet bi nantɔɔ Yennu nba tee barmɔnii daano na.

## 5

### *Kpaanii*

<sup>1</sup> Yimm tɔondamm nba be Yiisaweira sinsuuk ni na, n kpaaniie, min nba mun tee tɔondaano, ki n ninbinn din la Masia nba dii biak bianjinba, ki n bia saa lakin di manu bonchiann nba tan saa nyi paanu na, <sup>2</sup> n kpaaniie, ii guu Yennu niib nba be i nuu ni na, ki li daa tee miar kaa, ŋaan kii tee i yanboote, Yennu nba loon bianjinba; ki li bia daa tee likirii paaki; ŋaan tee i kpan koor a i tume. <sup>3</sup> Daa mantik dia niib nba ki Yennu turi na nan ninmɔnni, ŋaan te ki i binbenŋaŋ n wannib baa sii be bianjinba. <sup>4</sup> Ki Masia nba tee yudamm kur yudaano na-i tani jen, i saa la nyɔɔt nba kan biiri.

<sup>5</sup> Nnae mun, yimm nba tee nipaaun, ii saak saakab mɔi; ki i kur-ii gaan leeb mɔi, ki teen tarii i leeb boa, kimaan li sɔb Yennu gbouŋ ni a “Nɔɔ Yennu yêen karinbaandamme, ŋaan sommit binba sikint bi mɔŋ na.” <sup>6</sup> Li paak, ii sikin i mɔŋ ki teen Yabint Yennu nuu ni, ki u saa

donni yoo nba ki u loon. <sup>7</sup> Jiin man i daamii kur ki turɔ, kimaan u baka be i ni.

<sup>8</sup> Ii dia i mɔŋ man, kii mi i dataak nba tee Sintaanii na po; u line nan yanbɔr na, ki loon wun la sɔɔ ki soor. <sup>9</sup> Yɛtirɔ man, ŋaan teen Masia yada fanu, kimaan i mi nan Masiaweira leeb nba be tingbouŋ na ni mun di biak nan yaa di bianjɪnba nae. <sup>10</sup> Ŋaan li-i tee ki i dii biak yoo waaminna, Yennu nba mɔk ninbatinu kur na saa ŋamm i binbeŋ, ki chee i para, ki turi paŋ; ŋɔɔe din yiini Masia paak a yii di u manu nba kaa gbennu na. <sup>11</sup> Ŋɔɔe mɔk paŋ kura mɔkmɔk nan mɔkmɔk. Mamɔmm.

### *Foontjoontii*

<sup>12</sup> Sailas nba ki n mi nan u tee Masiaweirɔ nan barmɔnii na, ŋɔɔe sommin ki n sɔb gbouŋ nba ki fɔk na a n chee i para, ki kpaani, nan ŋanne tee Yennu maan nan barmɔnii. Li paak, ii diar fanu man.

<sup>13</sup> I leeb nba be Babilonn ki Yennu din gannib na foontii. Mak, wunba tee nan n bija na mun foonti. <sup>14</sup> Ii foont i leeb nan lomm.

Parmaasir-ii be yimm nba kur tee Masiaweira na paak.

**Yennu Gbouj Moor**  
**Bimoba: Yennu Gbouj Moor Bible**

copyright © 2003 Wycliffe Bible Translators, Inc.

Language: Bimoba

Contributor: Wycliffe Bible Translators, Inc.

All rights reserved.

2020-11-16

---

PDF generated using Haiola and XeLaTeX on 21 Feb 2024 from source  
files dated 29 Jan 2022

00d89ba0-4677-52d9-9bc5-aa3d7c5c966d